

Nakon uspješne privatizacije

CEMENTARA LUKAVAC POVEĆALA KAPACITETE

Jedno od do sada uspješno privatiziranih poduzeća na području Tuzlanskog kantona jeste Fabrika cementa Lukavac, čija je privatizacija, podsjećanja radi, izvršena 2001. godine. Kupac 51 odsto državnog kapitala je austrijska firma «Alas International». Ta firma kupila je dionice Cementare za 35 milijuna, ponudila investiciju od 120 milijuna, koja je do danas velikim dijelom i realizirana. Napravljena su nova, te izvršena modernizacija postojećih postrojenja, a uskoro se očekuje, pored stare, i izgradnja nove fabrike. Za poslovanje Fabrike najvažnijim smatraju izvršenu supstituciju uvoznog mazuta domaćim ugljem iz Đurđevika. Obim proizvodnje, koji se u Cementari povećavao iz godine u godinu, na kraju ove, trebao bi dostići cifru od oko 520.000 tona cementa.

- Imajući u vidu da smo ispunili prošlogodišnji plan, očekujemo da ćemo i ove godine ostvariti zacrtano. U naredne dvije do tri godine, naš plan je da povećamo kapacitete na 700.000, odnosno 800.000 tona cementa godišnje - kazao je direktor Fabrike cementa Lukavac Izet Imamović.

Po njegovim riječima, sav cement proizveden u lukavačkoj cementari plasira se na domaće tržište, izuzev manje količine koja je u prošloj godini izvezena u Hrvatsku.

- Cilj nam je da zadovoljimo potrebe domaćeg tržišta, a, ako bude potrebe, biće ga i za izvoza - optimista je Imamović.

U Cementari je danas zaposleno 260 radnika, čiji je prosjek plaća daleko iznad prosjeka u Federaciji BiH. U narednom razdoblju u planu je za poslužavanje određenog broja stručnih radnika za novi sistem upravljanja i održavanja postrojenja.



Global Ispat Koksna
industrija Lukavac

MIJENJA SE STRUKTURA VLASNIŠTVA

U cilju proširenja djelatnosti u Global Ispat Koksnoj industriji Lukavac (GIKIL), u kojoj indijsko-britanska kompanija Global infrastructure holdings LTD ima vlasnički udio kapitala od 51 odsto, Vlada Tuzlanskog kantona je, na sjednici održanoj 19. januara, prihvatila prijedlog Aneksa 2 Ugovora o pristupanju u Društvo sa ograničenom odgovornošću KIL, kojim bi se taj kapital povećao na 75 odsto, dok bi preostali dio od 25 odsto vlasništva ostao suosnivaču GIKIL-a, Koksno-hemijskom kombinatu (KHK) Lukavac.

Spomenuti omjer, kako je pojasnio ministar industrije energetike i rudarstva TK Mustafa Burgić, bez obzira na visinu budućih ulaganja većinskih vlasnika, neće se mijenjati do definiranja modela po kojem će KHK Lukavac biti privatiziran. Većinski vlasnik, kako je navedeno u aneksu ugovora, preuzet će obavezu izmirenja ranijih dugovanja KHK u iznosu od pet milijuna KM po osnovu neplaćenih doprinosa i obveza prema dobavljačima. Također, većinski vlasnik se obavezuje da u roku 12 mjeseci od potpisivanja Aneksa uloži osam milijuna eura u pokretanje četvrtih koksne baterije i četiri milijuna eura u pokretanje drugih proizvodnih kapaciteta u sklopu GIKIL-a. Također, obaveza većinskog vlasnika je da osigura odgovarajući obrtni kapital i da zaposli dodatnih 400 radnika, od toga 200 radnika KHK Lukavac, koji čekaju posao i 200 novih, po mogućnosti mladih. KHK Lukavac će na ime povećanja udjela kapitala svom partneru u projektu izvršiti prenos određenog dijela nepokretne imovine. Premijer TK Bajazit Jašarević tvrdi kako će se odluka većinskog vlasnika GIKIL-a, za proširenje proizvodnje sa dostignutih 700.000 na 1.400.000 tona koksa godišnje, uz definitivno rješenje statusa KHK Lukavac, pozitivno odraziti na kompletnu privredu Tuzlanskog kantona.